

von Wulf Wager

# Läbenskrise!



Bisher han i mi mit meine 52 Jahr eigentlich recht jong gfühlt. Sowohl von dr Optik als au von dr körperliche ond geischtiga Fitness her. Guat, vergesslich war i immer scho a bissle. Hochzeitstag ond so – Sie wissat scho. Aber heut Morga han i mir scho ibrlegt, ob i mi net vorsorglich em Seniorawohnstift amelda sott. Es gab zwar bisher scho a paar Zeicha, die in die Rich-

tung gwiesa hend, aber so richtig ernscht gnomma han i 's net. Neilich war i mit meiner Familie eikaufe. No han i a flotte, moderne, jugendliche Hos kaufa wella – mit Täschla ond Reißverschlüss ond so. Ond wo i des meine Mädla em Lada vorgführt han, hend se me süffisant a'glächlet ond gsagt: „Papa, du woisch scho, wie alt du bisch!?!“ Des war dr erschte Tiefschlag.

Dr zwoite hot mi wenige Tag später troffa, als mein, von mir bis zu dem Zeitpunkt sehr geliebte Frau, Zahnpasta für „für die reiferen Zähne ab 50“ ens Bad glegt hot.

Ond jetzt isch dr Super-Gau ei'troffa: I han heit morga a erschtes graues Hoor mitta en meine perfekt gschnittane und zom Schdaila frisch gwäschene Hoor entdeckt! Jetzt bin i nadierlich völlig in de Grundfeschte von meira Eitelkeit erschüttert. I ben total hin- und hergrissa gwea. Soll i mir jetzt d' Hoor töna, wie onser Minischerpräsidentenkandidat Guido Wolf oder soll i mir lieber glei a Glatze schneida lasse, wia dr Dalai Lama?

I bin no glei am Mittag zu meiner Friseurin, die meine Bürschtahoor scho seit fascht 30 Jahr schneida derf. Jetzt fährt die mir mit em Kamm durch d'Hoor ond sagt: „Langsam werdat Ihre Hoor grau!“. Dodruf han i leicht sauer gsagt: „Koi Wonder, bei Ihrem Tempo!“

Des isch scho a harts Brot, wemmr äldr wird. Des isch mr jetzt schlagartig klar worda. Wia hot mei Ähne gsait: „'s Alter isch a Krankheit ond an der goht ma z'grond!“

I frog mi die ganz Zeit, ob jetzt künftig em Gaschthaus en Seniorateller bstella muass. Oine von unsre Töchter hot mi jetzt au no zom Opa macht. Des isch garnet schlemm. Aber, dass i no neba dr Oma em Bett schlofa muass, dodrmit ka i mi irgendwie net afreinda. Also, mir langt's für dia Woch.

Bis näggschd Woch'  
Ihr

Wulf Wager